

清 代
三 朝 史 案



清代三朝史案

下

江蘇廣陵古籍刻印社

清代三朝史案

☆

江苏广陵古籍刻印社出版发行

(扬州市凤凰桥街 24-6 号)

金坛县第二印刷厂印刷

开本 850×1168 毫米 1/32 印张 38.563

1993 年 6 月第 1 版 1993 年 6 月第 1 次印刷

印数 1-310

广陵编号:128

定价:63 元

艾家鑑試卷內書寫條陳案

鄭大進奏查訊艾家鑑條陳摺 軍機處檔

湖北巡撫臣鄭大進跪奏爲奏聞事本年湖北鄉試八月初十日頭場交卷據受卷所官當陽縣知縣范鐸等回稟有宜昌府學生員艾家鑑試卷內全係稟陳事件臣隨率同提調官糧道郭世勳監試官漢黃德道周曰漢飭將該生押候查閱試卷內正草俱首寫俚詩四句接寫呈詞係言鶴峯州書役朦蔽州牧詞訟索賄傳稿抄批索錢包訟勒銀徵糧苛刻編保勒派稅契多索不賑饑荒審賊改供代書串詐差役承票豫勒多錢拘人到案或勒鎖私刑或串內奸播弄包定輸贏州境易藏奸匪強丐搶刦皆書役叅縱地方迎送官員搬運糧餉差保派夫並黃巖山稅俱請題免運送兵米請改由南路取士請增額四名懇達天朝等情瑣碎牽砌並未指有犯證據而科場大典藉試卷混寫呈詞已極妄謬臣又細察其詞如起首自古君難獨治句係屬泛論尙空格書寫下文既有至今及國家字樣乃遇君父字面並不擡寫且膽敢妄加使是二字於上再如叙恩赦處則稱頒恩赦奸險沐減等之德該生身列膠庠豈不知眚災肆赦

及矜卹愚氓之曠典凡情罪重者法所不原何云奸險沐德種種悖謬尤屬喪心病狂俱應嚴辦隨公同提訊據艾家鑑供犯生年三十四歲原籍荊州府松滋縣入籍宜昌府鶴峯州乾隆四十三年考進撥入府學如今現住宜昌府長陽縣傅家堰牌山地方父母俱故並無伯叔只有胞兄艾家瑤久經分居妻室劉氏一子艾流璋長女已嫁覃姓次女纔六歲今年七月犯生來省應鄉試暫寓勾庭書院內初八日進場入號初九日早題目下來因頭暈總不能作文後恐交納白卷被人恥笑犯生未進學以前原常幫衙門書辦繕寫文冊記得些公事禁約心想不如做件有益地方條陳請主考轉奏博個聲名更有好處就把鶴峯州進學原額八名要請增四名州城有衛昌遊擊營所領兵米向由荊州北路長陽一帶運送請改走南路又州屬每年有應完黃柏稅銀十四兩零祈請免徵地方士民自然說好但只寫這幾項恐難准行還得砌說些衙門弊病民間疾苦方能動聽就開首編寫詩四句先把州中書役顛倒詞訟索錢抄批包贏訟案徵賦苛刻編保勒派稅契多取不賑饑民改易盜供代書串詐差役索錢書役庇賊這些話寫上並寫迎送官員搬運糧餉差保派夫都要請禁

除題免然後接寫那請增學額幾條只圖准行其實所開各弊端都是平空造寫今蒙嚴審實不能指出舞弊及受害人姓名並憑證來的卷內遇君父字面未曾擡寫又妄用使是二字於上頒恩赦一句下寫奸險沐減等之德因犯生隨手書寫又勉強湊字當時自己也不省覺今蒙指出實罪無可辭等供臣因在闡隨密移督臣富勒渾督飭布政使梁敦書按察使劉義率同武昌府知府永慶密赴該犯省寓搜查並無不法字跡當將該犯發禁司監移咨學臣斥革衣頂一面密飭宜昌府知府李燦星赴該犯長陽縣家內搜查並訊查犯屬有無別項不法情事因道遠尙未覆到茲臣出闡後公同督臣提訊犯供無異詰無主使之人除俟該府搜查覆到另行從重按擬具奏外所有公同查辦緣由理合會同督臣富勒渾先行恭摺奏聞並將原試卷粘簽進呈御覽伏乞皇上睿鑒訓示再臣等覆查鶴峯州額征黃柏稅銀一十四兩四錢載在賦役全書係按山完稅歷年無缺又州城衛昌營兵米向係坐派荊州府屬江陵等縣役解歷由長陽縣之都鎮一帶運送並非繞道至該州文風臣等面詢學臣取進八名額數已寬不應請增均毋庸議外其餘開呈事款雖據艾家鑑自認平空

造寫不能指出證據但所臚各款皆屬書役易滋之弊亦不便因人廢言臣等現派委幹員前往該州按款密加確察提訊經手經胥並另核卷冊訪詢輿情果有一端得實卽嚴參究辦另行具奏合並陳明謹奏乾隆四十五年八月二十日

乾隆四十五年九月十一日奉硃批知道了嚴審定擬可也欽此

鄭大進奏審擬艾家鑑摺

軍機處檔

湖北巡撫臣鄭大進跪奏爲審擬具奏事竊照鶴峯州革生艾家鑑于鄉場試卷內妄作請增學額等條陳並臚列該州胥吏朦官滋弊各款當經臣查訊不能供指實據並查試卷內有字面語句悖謬當將該生斥革羈管派員搜查省寓并密飭宜昌府知府李燦星赴該犯家內搜訊令將所臚胥役弊款前往訊查各緣由同原試卷粘簽進呈會同前督臣富勒渾先行奏聞奉到硃批知道了嚴審定擬可也欽此欽遵在案茲據該府李燦稟覆親赴艾家鑑所住長陽縣傅家堰地方家內督全該縣龐慎鍊搜查并無不法字跡隔訊犯屬地鄰人

等僉供艾家鑑平日亦無武斷滋事別情該府又卽密赴鶴峯州按照詞列各款提訊經手經胥吊核卷冊摘傳保甲里民訊訪招告并無所指各弊分晰錄供稟覆并據委員武昌府知府永慶會同該府李燦審擬由布政使梁敦書按察使劉綦詳解前來臣隨提犯親加研訊緣艾家鑑原籍松滋縣入籍鶴峯州乾隆四十四年科考入學四十五年七月由現住之長陽縣家內至省鄉試八月初八日進場入號初九日早得題後頭暈不能作文恐曳白貽誚因從前曾在州衙幫書吏繕文記憶公事禁約遂起意欲將州學請增名額衛昌營兵米改道運送黃蘗山稅免徵寫作條陳冀考官轉奏邀譽又恐難准須多列事欺動聽遂於試卷內先寫俚詩四句次編州中書役朦官顛倒詞訟索錢鈔批包羸訟案徵賦苛刻編保勒派稅契多取不賑飢民改易盜供代書串詐差役索錢書役庇賊等款并迎送運糧差保派夫均請禁除接叙請增學額等三項以冀准行初十日交卷經受卷所官查出稟經臣移行斥革羈管派員搜訊將試卷內字面悖謬處粘簽進呈奏奉硃批嚴審定擬茲據宜昌府知府李燦前赴長陽縣該犯家及鶴峯州分別搜訊明晰將犯審擬由司詳解臣親加嚴鞫據

艾家鑑將撫拾砌款條陳各情供認不諱詰以試卷內遇君父字面因何並不
檮寫又敢妄用使是二字於上又稱頒恩赦奸險沐減等之德用此語句係何
意見據該犯堅稱使是二字是孟子伊尹耕於有莘之野一章內成語與下文
使是民爲堯舜之民對言犯生圖圖引用成語致未檮寫又只知遇赦的原是
些犯法奸徒草莽人不知情重人犯法所不原以致寫了奸險沐減等之德這
是一時強湊字面錯悞犯生上條陳還想有好處那敢稍有干犯等語矢口不
移至詞開胥役朦官各款如顛倒詞訟索錢鈔批包羸訟案代書串詐差役索
錢係言聽訟之弊今據該府前往提訊經胥代書人等並檢核案籍州民詞訟
甚簡每期控訴僅止數紙歷任知州俱隨時批發貼示署門不須向書吏鈔批
雖有官設代書二名而民人自寫之詞該州亦無不受理代書無由串詐事俱
立限審結鮮有翻異招告亦無被勒受屈之人出訴又詞開徵賦苛刻稅契多
取係言浮勒之弊今據該府訊查該州額徵地丁條餉舊賦新墾等銀共止二
百八十餘兩內有秋糧銀七十一兩零例不徵耗每歲開徵預填應完銀數由
單發鄉保分給花戶查照聽赴櫃所自封投納零星小戶銀錢聽便櫃書對數

登簿隨時截給收照並無糧戶控告苛勒並經該府較驗庫戥拆兌在櫃銀封均屬相符並無浮多該州地處山僻田房契價甚輕每年納稅無多該府摘提已投稅業民並契驗訊俱稱按契價每兩完稅三分之一之外並無多費又詞開不賑饑民一欸據該府查明該州山地多種包穀連歲豐稔即四十三年鄰境雖有偏災該州仍收成八分並無匿災之事又詞開編保勒派改易盜供書役庇賊等欸據該府詢查各牌保稱該州編造保甲牌冊紙張等項俱出官捐並無被胥役勒派摘訊里民亦無異詞民間竊案均隨時緝辦近無報竊惟本年二月及五月內有州民陳鳳池邵月明劉玉占三家被盜俱經緝獲首夥多犯究詳僅逸盜二名現在比緝書役並無改供庇賊又詞開迎送運糧差保派夫請除一欸據該府查明州城衛昌遊擊營兵米六百八十餘石撥自荊州運抵鶴峰因未設站夫歷著保甲雇覓鄉夫每夫背米三斗每站給銀四分卽偶遇官員因公往來雇用夫腳悉按站給價並非派累亦難停除各等情並經臣與各司道密加查察無異復逐一嚴詰艾家鑑據供實係砌欸妄瀆前已供明若有可指實屢蒙嚴審豈反肯代人隱瞞等語似無遁飾查艾家鑑于試卷作呈

雖字面語句引用錯謬尙非干犯但砌欺妄控鶴峰州書役等弊又列請廣學額等欸以博聲譽殊屬狂妄滋事艾家鑑合依驀越告機密重事不實發遙遠充軍例請從重改發烏魯木齊等處充當苦差係革生照例免刺該州書役羅見開等訊無情弊俱飭省釋該犯寓所及家內搜無不法字跡所稱免徵黃柏稅請改兵米運道增廣學額等欸業經臣奏明無庸查辦均無庸議所有審擬緣由理合恭摺具奏並另繕各犯證供單敬呈御覽伏乞皇上睿鑒勅議施行再督臣舒常因查閱營伍公出未及會訊合併陳明謹奏乾隆四十五年十一月十九日

乾隆四十五年十二月初四日奉硃批該部議奏欽此

艾家鑑試卷原文

宜昌府儒學附學生員艾家鑑應乾隆四十五年分湖北省鄉試本身並無違碍過犯亦不係門禁隸卒之家冒籍頂名之人今將年貌籍貫及所習經書開報於後

計開

一本身年三十四歲身中面紫有鬚係鶴峰州謙吉里民籍

一經書 習詩經

妄求名譽赴科場忽憶弊端敢縷揚下顧今朝枉到此惟祈百姓頌君王
竊維自古君難獨治分設官員至今官不自勞因設書役名分雖異理實
則同皆與國家鞠躬盡瘁出力報效使是君爲堯舜之君上兆夫景星慶
雲之祥悉爲閭閻分冤理枉止盜弭奸使是民爲堯舜之民嬉遊於光天
化日之下一體行事相安無事上下相得朝野幸甚今非唐虞之世而有
唐虞之君快逢壽登七十欣瞻位際五九下恩詔神人饗錫予之樂頌恩
赦奸險沐減等之德正謂普天共沾深恩率土均被和風但生有不敢直
陳者有不得不陳者即如鶴峯州斯固化地原屬改歸東南壤連長石慈
桑西北地接恩宣巴建雖前後牧主俱有仁厚之政奈無良書役不無蒙
蔽之奸慣圖一己私慾屢剝羣黎膏髓遇民訟不能秉公辦理惟索糞金
多寡罔論事體曲直臨官斷未爾據實輒行但視壑欲盈歎顛倒案件是

非放於利而行有能滿懷方傳稿利外無他喻稍不如意不鈔詞藏壁單多索鈔批錢文十張僅貼一包訟案詐勒兩造銀兩九場許贏十徵收國賦任意苛刻天地於焉心寒編造煙冊逞欲勒派鬼神爲之夜哭稅契約額外勒索銀與錢當奇荒不發積穀以賑饑瞞心昧己大掩聖主惠愛斯民之隱錄賊供設計肥囊以易情串代書訴無原詞不做紙欺天滅地不體本主使民無訟之意及其票入差役蠹害較書尤甚豫取夫騾費項次講差費鞋脚有錢幾十千方准下鄉提人拘喚方到案即設巧制苦阱或勒鎖暗室私刑或巧串內奸播弄或包輸事可以贏或詐贏事必定輸威風凜凜官較於彼不及聲勢赫赫彼較於官有餘若遇原被金盡便乃拖延不投審以致告訴日久遂爾無奈只自休嗚呼冤者終於冤誰憐三年不雨傷哉屈者久於屈那管六月飛霜言念及此殊甚髮指尤有難已下併爲冒罪縷陳鶴邑西北毗連之所易爲藏奸聚匪之區崇山峻嶺茂林巖窟深溝大壑懸泉古木奸匪居內罔覺卽覺亦難弋獲聞信而走一舉足卽離本境望風而逃二三里便入鄰封加以書役奸蠹肆書柳串分肥

致令奸匪蜂起愈熾如虎生翼晝以覓食爲由沿鄉窺探夜則雞鳴狗盜無所不爲遇單家獨戶而強勒幾升幾斗有則攸然而逝無則放辟邪耻逢孤邨荒郊而公然成羣結黨暗藏木鐵器械竟爾攔路刼搶始由欲爲懼爲不敢大胆久則能爲敢爲胆大包天塗面挂鬚相與破門陣入捆綁拷打胆敢燒殺奸擄巍巍然夫誰與敵恐懼乎惡得而禁不惟老幼心驚胆碎卽在少壯魂飛魄散聽其搜尋可憐家徒壁立隨其取携哀哉室如懸罄袒裼裸裎閤室傷心慘目饑餓枵腹舉家泣血飲恨風聲傳聞人心惶恐萬幸告發時難盡獲緝牌遍拿在上名聲可好藉端滋擾在下冤鬱難堪能正捕班尙期覓獲除害縱受苦辛能耐奸猾快役惟思竇放肥己巧行攀撻罪無辜吁嗟被盜驚官盜益熾噫嘻受害鳴公害無休此皆書役忍心害理是以羣黎遭苦受難事本真實受害人報存懼心案原重大守土官非不能辦總由羣蠹蠹深以故奸匪脫網計惟多方早剪世使滋蔓難圖且鶴邑巖多土少居民饒裕無幾兼值戊亥歲歉黎庶困難言無如迎送官員鄉保設取夫之例搬運糧餉書役派夫差之額不遵不敢

遵之實艱男女童叟窘景難訴不沐題請恩免終受虐阱憔悴黃蘗山稅
原以山有所取斯樹既盡山又高嶢難田稅無所出懇恩題免解鶴兵米
北路一行多年計程遇邇南近三百餘里工費兩省請由南幸聖天子作
育人材開科取士士等原請一十二名蒙賜八名以俟廣增茲士子寒窓
琢磨文風漸振懇題照請初定數目頓予四名以鼓士習生忝儒列罔知
忌諱幸遇欽命文宗大人臺前正萬民有亂之天寔鶴屬錫恩之主惟一
念重憐於螻蟻必百世毓秀於麟鳳懇達天顏以廣聖恩千秋蒙盛德萬
載戴祥光生無敢戲渝瀝血陳情謹具此以聞

魏塾妄批江統徙戎論案

福隆安等奏魏塾侯質訊事竣卽正法摺 軍機處檔

兵部尙書臣福隆安等謹奏爲遵旨核擬具奏事山東巡撫國泰奏壽光縣民人魏塾妄批江統徙戎論實屬悖逆請照大逆凌遲處死律正法一摺本月初四日奉硃批行在九卿核擬速奏欽此據稱緣魏塾主唆縣民高昇誣控妻兄蘇二禿盜賣伊妻蘇氏並捏竊圖詐之案經該縣知縣審出係魏塾代作呈詞隨赴伊家搜出呈底并查有應禁之澹園續集等書籍及所批江統徙戎論後評語內以今之回部比擬晉之五部因提訊該犯據供魏塾係壽光縣人家裏有幾部書是先世留下的這澹園續集有干違禁實在不知道那徙戎論是從晉朝江統傳內抄出因見晉惠帝容留五部不聽江統之言後致五胡之亂就想到如今各處回教都是外國來的恐怕後來也有混鬧等事等語該犯存留違禁書籍已屬不法其抄錄徙戎論混加評語胆敢將今之回教擬晉之五部實屬悖逆未便稍稽顯戮應將魏塾請照大逆凌遲處死律請旨正法但該犯現在尙有應行質訊控告壽光縣差役科派一案請俟審明之後再行辦理等

語查該犯魏塾家藏應禁書籍存留不繳已有應得之罪至將江統徙戎論抄錄加批妄以今之回民比晉時五部更爲荒誕現今各處回民奉公守法並無不安本分之事卽如乾隆三十九年壽張縣奸民王倫聚衆謀逆卽有洪姓等回民隨助官兵勦捕匪黨甚爲出力曾經獎賞該犯何得妄爲比擬其狂誕悖謬實爲不法已極應如該撫所擬將魏塾一犯照大逆凌遲處死律凌遲處死俟所控縣差科派應行質訊事竣卽行正法其應緣坐犯屬家產該撫查明照例辦理至該撫摺尾所稱魏塾審解時伊兄魏永清復有指告該縣妄拏此案及書役科派之事現飭審辦等語查魏塾卽係前在都察院衙門控告該縣科派枉斷之魏姚氏長子其原控情節已奉欽派侍郎阿揚阿按察使王昶前往查審應聽另行審明結案是否伏候訓示謹奏乾隆四十五年四月初四日

臣福隆安

臣梁國治

臣董誥

臣福長安